

四庫全書

集部

欽定四庫全書

集部

學易集卷六  
七

詳校官庶吉士吳烜

侍讀臣孫球覆勘

總校官進士<sub>臣</sub>朱鈐

校對官學正<sub>臣</sub>常循

謄錄監生<sub>臣</sub>薛翰

欽定四庫全書

學易集卷六

宋 劉跂 撰

序

溫道士字序

熙寧十年冬余侍親京師間則訪故舊與語而得溫子  
其為人大抵恭而和喜讀書善談說然少而有目胥居  
欲就清淨避事自養益浩然欲遠引者久而不欲去其

母明年夏余居定力寺晝有道士叩門且入余愕視則  
溫子也問其故則居于醴泉觀事其師王慶之既閱月  
矣為余道其詳已而泣且請曰某不孝至于此昔先人  
捐館舍母氏蓋甚少而安適貧約不少倦為有子也某  
不幸以疾不得寧而去雖母氏安伯氏之養聽許之去  
獨不歉于心乎將何以教之余聞而悲之因語曰古之  
人稱不孝有五子曾有一于此乎且擇其術安其身不  
以不義施于親而終之君子謂之孝而義之厚薄勢之

疏密則不預焉子殆似于此雖然猶有告也京師聲利之宅非有佳山水而縉黃聚集視天下為多蓋語默動容之間有足以施其親者甚衆子之質誠美矣又知吾言而終之誰以子為不孝他日又請曰某之師名之崇道願得字以為戒也余曰所謂道有以加于孝乎子惟勉余言則無媿于道矣乃字曰孝俶而書前日之言遺之遂以為序

傅坦之字序

古之人有身被窮約而簡易佚蕩曾不戚戚如漢之揚雄者有富貴利達而內不自得奄奄如唐之韋執誼者夫得而悅失而戚亦人之常情而兩人者如此由是言之則居世悲憂愉佚繫其心所處何如而身之利害不預焉蓋人之不可誣久矣內直則安內不直則歉然之色不謀而生彼雖陰自閉匿陽為充肆自以為有處而不情之徵兆見于面目之外以是而享榮名躬利澤特以身而寄也其心雖欲一日逍遙且不可得况有所謂

直道而行者哉夫惟昔之達者視處其身如庖丁之處  
其刀恢恢乎其游于世無入而非樂地此無他其心直  
而已傳所謂仰不愧于天俯不忤于人其是之謂乎吾  
友傅子少好學外簡易而內淳至名曰坦之其體定矣  
然一有愧于中則將有不果坦者乃為之字曰無愧夫  
人之處其中者誠無愧矣則披心委情雖之鳥獸蠻貊  
行矣況于人乎況于州里乎使不幸而貧且賤則揚子  
是已未能無愧也則險偽將不召而至雖一語一默且

不得以直達況于出處乎況于利害乎幸而富且貴則  
韋氏是也又何足道蓋嘗特是以相天下之人凡詭形  
匿智俛仰低委號為崇深以自阻固者彼皆有至愧于  
中者也豈不欲為坦直而心實使之如此何可誣乎然  
則自斯術以往豈特吾子志之吾實志之久矣期與吾  
子共之

東原集序

吳人聘魯聽歌風雅頌而識其國俗之變及其得失之



迹漢儒稱民性剛柔繫水土之風氣備論四方分野稟受各異某少時讀之以謂性一兩事物雖異其人或殊哉而驟聞歌辭亦豈能盡識其故如目覩然是皆史家傳會嘗私竊疑之及身壯且老以事適四方多與其人遊處歲久漸漬熟其情偽雖曰土風所致而其人資質淵源故自有不可同者頗已驗班生之說又得其所為文觀之詳味託寓之情以驗其所效于後班班多中則季子之智未易為不知者道然後乃知少之時信理

而不信事于學為陋昔我先人蚤以諸生從鄉先生龔公學問數道公剛毅誠慤行安而節和其為文章似其為人蓋上世居萊蕪徙淄川又徙東平皆在齊魯儒學之地自孫宣公賈存道先生泰山孫徂徠石二先生兵部王公吳文肅公李天章公十數人者皆以經學治行大顯于時而公繼之磊落相望立乎大中之塗世所謂醇儒樸學誠在齊魯為多則分野之論于是焉信公有易說文中子說臺諫奏議皆別為書藏家論策記銘書

序詩文凡若干篇為東原集五十卷其言深博爾雅造  
次必于信義人皆知非淺丈夫之作而或未能深探其  
旨異時智識之士一歷耳目則所謂泱泱乎淵淵乎必  
有能辨之者公沒後三十餘年曾孫愔能讀公書求文  
為集序顧某也何足以知公哉以所聞于先人為詳故  
書卷末以自致其景仰之意某年月日謹序

萬佛名經序

趙郡李侯常武之夫人樂安孫氏自常武歿屏居里第

閱誦藏經積十餘萬歲鈔取佛名類聚次第數至一萬  
使其子周南召南繕錄成書析為十卷題曰萬佛名經  
嗚呼善哉未曾有也昔在無數劫時有同名佛同名國  
城同名父母同名眷屬佛言使我住世微塵數劫說此  
同名佛數終不能盡况復種種異名由是言之佛名廣  
博無有央數非佛與佛誰能知者然薄伽梵為舍利子  
說七佛為善作長者子說八佛為彌勒說十三佛為波  
離問三十五佛妙光世中五十三佛乃至過去莊嚴未

來星宿見在賢劫各有名號若干若百若廣若畧廣或  
億萬畧惟一二非限量也非多寡也應其機緣隨其願  
力故無限量中示為限量無多寡中說有多寡今夫一  
人之力十數歲之間期至微甚眇而受持成就遂盈萬  
數亦云極矣不可有加矣學道者安住空寂捨諸亂意  
端身正向不著形色繫念于佛唱其名號入于一行三  
昧了知十種功德誠如是雖一佛所足以種諸善根故  
暫稱南無滅罪塵劫具足十念棲神淨土而況增益積

累如是之多又復書寫受持展轉流布使未聞者得聞  
未信者起信如人處闇照以燈燭如人方渡助以津梁  
不離于此位而萬佛之名現前推原其功自夫人起其  
為利益寧有既耶抑嘗聞之一切諸佛法如像如光景  
如夢如水月故色與虛空等為幻事佛及衆生均是增  
語然則謂名號畢竟有何異說食充飢謂名號畢竟無  
亦應喚火得水學道者如是思維如是悟入然後于諸  
名號一意自信雖不誦猶誦此之不知而逐于音聲氣

息胸舌喉吻雖誦猶不誦也可不察哉夫人之子求為序引因試論之以成夫人之志云河間劉某序

後序

夫人世家錢塘曾祖贊隨錢俶入朝賜以官祖質父量皆擢進士第妣李氏常武姑也世為婚相好故始筭歸常武常武事親孝得官無仕進意冲澹不競人物為鄉里第一夫人與為體宗族皆謂之稱皇姑王太夫人嚴重謹禮罕能順適惟夫人是安寢疾久夙夜服其勞禱

于上下請以身代喪居哀次因得羸疾彌年乃有瘳已而疊疊綜家事調護內外人情感服尤好施求者靡不厭其意孤嫠來歸如仰慈母獎護成就曲有恩意視人困厄猶已困之大寒輟衣衾當案推飲食惟恐弗及人或為夫人難之雖其子亦稍動容勸止夫人笑而不應雅性無嗜好服用極儉薄閱佛書解其要義晨夕禮誦非有故未嘗輒闕蓋常武歿後十有六年享壽六十有三大觀元年正月二日終于適寢二年七月十三日祔



葵常武墓河間劉某既弔夫人之子周南召南于廬他  
日又弔于殯二子同辭泣曰先夫人積行勤勞備有衆  
善法應銘顧其子孱陋莫為介紹于世之顯人以得銘  
日月逝矣念先夫人所錄萬佛名經夫子嘗為序意者  
益著副篇載其行事并納諸壙中儻亦可以為銘矣乎  
某曰是亦銘也已雖然序經可能也若曰夫人之事敢  
辭又固以請迺採掇事蹟得其實為後序如二子之意  
焉

鄭州原武監碑陰後序

元祐六年八月天水趙公君錫以監牧使守鄭問其屬  
曰原武監吾先大父文定公所請建歷年滋多中廢而  
復其事迹本末固宜有存者吏閱故牘不能槩見或得  
故邯鄲李公淑所為監記良悉而其石毀亡公覽之慨  
然將復紀刻會易守宛丘八年四月中公自陳復來守  
鄭州礮石前具乃使節度判官朱浚明推官孫勰書篆  
李公舊記凡慶歷丁亥之官氏咸叙刻之又使管城令

劉某別為後序刻諸其陰按原武監由慶歷而後官守  
事治如邯鄲語中無所改逮熙寧七年四月河南使者  
有言始析而入旁監八年罷南北兩使其監悉廢于是  
賦馬給軍墾地為租廬舍器用聽他有司射取或拆賣  
之旬月之間其地為墟又十有三年有詔復為監如故  
以京輔近郡保馬八百匹六縣故地千四百五十五頃  
有奇隸焉是歲鄭始復為州諸役並興而監尤急緡錢  
所發不問名籍吏毋得舞文番休以百計而奔走執事

之人自稱詔以六十日為期期足而畢凡為屋八百二十有四官居園舍吏卒之區前記所有略具而井棚溝封植藝之事其職在縣吏者歲歲增治之以為常以今會之一廢一復費累巨萬而歲之經用不預此亦傑役而七年于茲未有書夫國馬大事也利害之數上之人實圖之則何為而廢何為而復固無得而記云至于事物名數及其歲月烏可以無識抑聞之異時尊育之法常在沙苑及河北而原武沙苑諸監專牧養而已今並

河竭澤馬皆他產不能暑濕故登駒之賞設而未應牧  
地散接田壟華離相錯其形如犬牙如蠹文如靨之著  
面非截彼屬此公私易置疆理不可得而治也溝封之  
法廣深三尺其崇再倍又植之林以為阻固歲時湮圯  
工以千計而丁壯數輩獨任其責一捐閑粟數百千斛  
以募貧民則倍為崇深可支十歲嘗得是三說于邑人  
其言雖未必盡是要必有可擇者故因叙前記纂輯後  
監之事并錄其說以備有司攷焉八年五月一日序

闕題

粵自靈山拈出葱嶺傳來天下嚴林分枝布葉石霜古  
月海會重圓畧在祖山隱若敵國誰主茲地演公其人  
惟公系本坤維化行淮甸三提祖印二紀于茲仁義道  
中空華發果荆棘林內石筍抽條莫將優鉢現前翻作  
葛藤會去本覺首座見推道伴俾述叙言兔角龜毛敢  
期有實狐裘羔袖終愧非宜紹聖元年十月四日序

般陽集序

往歲守官鄭圃地當孔道西游釋子多所延接問其所  
詣非五臺即招提招提西都道場今芙蓉湖老人楷公  
昔所棲止大善知識徒衆輻湊幾在臺山分受禮謁其  
後遷寓東州機緣句偈徃徃在人風聲所臨靡不歸嚮  
于是臨淄趙侯摹公偈頌號般陽集詒書鄙人請為序  
引某早歲信道老無所得究觀妙語欲加形容而悶乎  
情忘嗒焉辭喪夫與豹除斑未之能也為蛇畫足豈其  
然哉嗚呼洞山之後五世而幾息投子以來一傳而大

振興衰天也亦由人歟政和五年十月望日河間劉某序

金石錄序

東武趙明誠德甫家多前代金石刻倣歐陽公集古所論以致書傳諸家同異訂其得失著金石錄若干卷別白牴牾實事求是其言斷斷甚可觀也昔文籍既繁竹素紙札轉相謄寫彌久不能無誤近世用墨版摹印便于流布而一有所失更無別本是正然則謄寫摹印其



為利害之數畧等又前世載筆之士所見所聞與其所傳不無同異亦或意有軒輊情流事遷則遁離失實後學欲窺其罅搜抉證驗用力多見功寡此讐校之士抱槧懷鉛所以汲汲也昔人欲刊定經典及醫方或謂經典同異未有所傷非若醫方能致壽夭陶景亟稱之以為名言彼哉卑陋一至于此或譏邢卽不善讐書邢曰誤書思之更是一適且別本是正猶未敢曰可而欲以思得之其訛有如此者惟金石刻出于當時所作身與

事接不容譌妄皎皎可信前人勩劬鄭重以遺來世惟恐不遠固非以為夸而好古之士忘寢廢食而求常恨不廣爾豈專以為玩哉余登泰山覩秦相斯所刻退而按史遷所記大凡百四十有六字而差失者九字以此積之諸書浩博其失胡可勝言而信書之人守目所見知其違戾猶弗能深攷猥曰是碑之誤其待未之思乎若乃庸夫野人所述其言不雅馴則望而知之直差易耳今德甫之藏既甚富又選擇多善而探討去取雅有

思致其書誠有補于學者亟索余文為序竊獲附姓名于篇末有可喜者于是乎書

### 金石苑序

東平劉繹如成叔裒次前代金石刻為書不以世代歲月獨以得之先後為次第取其先大父素所藏著卷首凡得四百裒目曰金石苑請余文為序始余識成叔時年二十餘方以進士得官時時來過余舍所誦說已多鐘鼎間語其後又十四五年每見每進于前今遂以成

書亟有請幅裱大小頗得中制裝褫亦精好覽之殊可喜自三代漢唐迄于今金石遺文甚多蓋不可為量數湮沈消落之餘所存猶不勝計然而散在四方遐僻幽絕人力莫能盡致今所有如此其于玩心游目亦可謂有餘地則成叔之死不足恨其小也雖非長洲博望彌山亘谷而比之託寓迫迮無所散懷不亦既富矣乎余友人滎陽王怡彥適身為縣令而夫妻手裝碑本無虛日職事曠被拘不得去而不悔浚儀董之明子年少亦

收藏古今刻辭疊疊成誦數遺余東漢以前墨本東武  
趙明誠德甫貴公子酷嗜古學倣歐陽公集古攷定同  
異為一家言今成叔又有是書且言當滿千裘乃止士  
大夫好之篤而余未識之者又不知其幾何昔人刻石  
為二一植山上一沈水中又多即山磨崖大書深刻彼  
其意豈徒然哉所以期望于後之人至深切而常情漫  
不領畧視碑之存亡何啻越人視秦人之肥瘠嗚呼世  
常得如數公者可謂無負前人哉近有知名士文學著

稱問其書笥所藏赧然自失徐曰為有力取去余每向人說數公必舉此士為對蓋語勢當然則今所書亦不得而畧也

泰山秦篆譜序

史記載秦始皇帝及二世皆行幸郡縣立石刻辭今世傳泰山篆字可讀者惟二世詔五十許字而始皇刻辭皆謂已亡莫可復見宋丞相呂公鎮東平日遣工就泰山摹得墨本以慶厯戊子歲別刻新石親作後序止有

四十八字歐陽文忠公集古錄亦言友人汪鄰幾守官奉高親到碑下纔有此數十字而已余以大觀二年春從二三鄉人登泰山宿絕頂首訪秦篆徘徊碑下其石埋植土中高不過四五尺形制似方而非方四面廣狹皆不等因其自然不加磨礱所謂五十許字者在南面稍平處人常所摹搨故士大夫多得見之其三面尤殘缺蔽闇人不措意余審觀之隱隱若有字痕刮摩垢蝕試令摹以紙墨漸若可辨自此益使加工摹之然終意

其末也政和三年秋復宿嶽上親以甌椎從事校之他  
本始為完善蓋四面周圍悉有刻字總二十二行行十  
二字字從西南起以北東南為次西面六行北面三行  
東面六行南面七行其末有制曰可三字復轉在西南  
稜上海行字數同而每面行數乃不同如此廣狹不等  
居然可見其十二行是始皇辭其十行是二世辭以史  
記證之文意皆具計其缺處字數適同于是泰山之篆  
遂成完篇宋歐陽二公初未嘗到惟憑工匠所說無足



怪人多以二公為信故亦不復詳閱余既得墨本并得碑之形象制度以歸親舊聞之多來訪問倦于屢報乃為此譜大凡篆字二百二十有二其可讀者百四十有六今亦作篆字書之其毀缺及漫滅不可見者七十有六以史記文足之注其下譜成揭壁間久幽沈晦之跡今遂歷然秦至無義不足論然李斯小篆古今所師經千三百有餘歲而復新茲可尚也如親輶遠黎史作親巡遠方黎民金石刻作刻石著作休嗣作世聽作聖陸

作垂體作禮昆作後則又史家差誤皆當以碑為正其  
曰御史大夫者大夫也莊子曰且而屬之大夫衛宏曰  
古文一字兩名因就注之史記于琅琊臺刻石脩列從  
臣名氏余家所收琅琊殘字亦有五夫字然則夫從一  
大因不復重出歟

記

馬氏園亭記

元豐癸亥余侍親在宋冬十月舅氏自汶上來問訊慰

勞從容燕語遂及鄉里宗族故舊朋友徵存弔亡嘉興  
念廢曰甚哉人事之多變也昔之崇墉邃宇爰業輝煥  
今或散蕩離析列于編戶昔之膏腴沃衍田賈畝金今  
或荒穢不治麋鹿是保昔之聯車列騎繁纓蜀繡今或  
重胝累胼逡巡道下昔之博珍善味醇釀滑甘今或曰  
晏嗷嗷饘粥不入至于日改月化朝戚暮悅處者出者  
少者老者語未既悲嘆嘻吁愀然變容慨然而問曰異  
乎哉何其廢者多而興者鮮耶余避席曰不然休旺代

謝消息盈虛天之有也川竭谷虛丘夷淵實地之有也  
而一興一廢人豈逃之哉且草木之將榮必悴龍蛇之  
將伸必屈溫室洞房吹臺歌榭寧獨非昔之牢獄犴狴  
乎火耕水耨陸海之地寧獨非昔之荆棘丘墓乎由此  
觀之貧不必不富賤不必不貴興者未足恃廢者未易  
絕也且東平之為郡左岱宗之鎮右鉅野之澤自崇岡  
峻嶺以至通溝長漕水陸之珍魚鱗雜襲通關帶關延  
薨接棟居者櫛比來者輻輳此固天府之地余親之所

安將卜環堵之室以為居者也若乃舉強振弱興滯補  
廢憂患相恤功力相成樂事安業者右之掖之情游弗  
率者左之振之使所居移風人人嚮勸此則所望乎鄉  
人之賢者固亦賢者之用心何獨嘆異之而已于是舅  
氏欣然喜曰子言是也然吾何足以及此吾所善馬生  
希古其先力產起家已而寢弱弗振至生以醫顯復其  
業如初葬其三世城西南原即墓買田築室以老庶幾  
有終始者是可嘉也子其以是說遺之以慰其勞以戒

其終諷鄉人之不然者儻亦可乎迺錄其言俾刻石于壁舅氏樂安任某記者彭城劉某書石南陽蔡某

曹州重修學記

仁宗皇帝慶歷四年詔書下取士教養之令三事其一曰立學郡縣之吏頓首奉詔庠序並興而曹實近藩久之缺然皇祐中錢明逸為州始以令從事學成郡之東南隅其事具錢公所記語中及熙寧初以經攷士立教授官事益衆多而此學不以時繕治歲月披靡浸陋至

不可支來者徘徊引去學以狀言州州言監司累章數十莫肯應者元祐三年轉運判官張公景先以錢二十萬畀州使新之轉運副使胡公宗回益給二十萬州乃選屬官綱紀葺事以故址卑下雨輒注室中則盡撤屋隱以瓦甍增崇三尺有奇度屋以尋其崇不能二尋深亦如之則五分其崇深而益一故門在西北由大衢益折而南如入陘中則廟前翼張兩門門有巷以達于衢後庖在東與學官比舍廩廩顧在其後則改卜于西

寬饒下地車重易至滌濯出焉惟廟及兩堂可以因舊  
則直補塗膜之其弗可者輒更之如此先是召人計之  
直百萬因怠者數矣會王公子韶韓公宗古皆以儒館  
久次相踵為郡下車攬政以學為急而所選屬官與學  
生之執事者通事務有心計商畧調度轉材儲貨新故  
相足物物經意役徒雖髡鉗胥靡然劇易番休飲食豐  
浹勤者別賞以金錢無不畢日而作故財力雖薄而功  
遂倍或言大姓子出入學舍宜有助者衆謝不然曰徒



擾之耳無益也一毫不干人人亦不知凡為費四十八萬踰三時而學成周以重階袤為兩序中奠廟室環列生舍夏有夾窻冬則重箔會講說于橫經決疑難于主善禮器之藏經籍之府賓客之次煬燹委積諸所宜有皆備無缺又裒美材構亭沼上瀾沼而疏之藝木以為陰氣象肅遠得閼燕之勝明年春釋奠于廟用幣庭宇明邃儀物大稱登降興復之節不加舊而肅敬自新靡不感勸已而序賓席齒飲食堂上獻酬拜揖禮成而罷

退就次舍絃歌讀誦于于愉愉以學為樂誠不知暴慢  
鄙倍之心安自而起所謂為善易為不善難于是乎在  
鄉人長老乃始太息出涕曰生無益于縣官而所以教  
毓成就其子弟至深甚厚不有紀刻何以示不忘某備  
員學官雖微人言固願列之按曹地房心之分野堯作  
成陽舜漁雷澤皆在其地而溝澮之潤接乎洙泗粵有  
聖人之遺風焉故史家稱其人重厚多君子好稼穡以  
致畜藏然他日號為事劇選將必以精急趣辦而其人

亦習為懷伎以抵法禁痛乎風俗之所移豈其本然哉  
昔文翁化蜀學者至比齊魯朱博大改齊俗則禮節如  
楚趙匹夫自行其志為效如此況以天子詔令勸學教  
士于聖人風化之地又王城百里而近者乎往時濟陰  
之士蓋有授徒數千如曹伯山者定著六經之文如張  
子儁者遠人從學執經壑畔如孫仲或者後來人物輩  
出不減前日其以位顯者人人能言之不復論著其餘  
學行自勵尚多有之世未之聞爾今學成士萃禮行一

鄉此固學士大夫知名之時勉之哉何遽不如二三子者某雖且終更而去異時過境而問庶幾親以身見之惟日望之元祐四年二月一日記

鄭州滎陽縣移建新學記

滎陽為鄭屬邑直衝衢界兩京之間于治固劇其地通達易野在前世為戰墟及建郡縣更廢徙則又兼有三河諸陵錯雜之俗凡為邑者平旦視事操牒負券排決而入丁壯垂白紛列庭下臺符府檄金穀趣辦是其尤

急其次稊稗數鼓連證會逮而民所赴愬曲直論決顧  
在其後已而吏戢戢取判于前其事或米鹽毫忽而案  
牘積累至溢几格心目憤耗漫不暇領畧矧敢可否則  
亦奮筆畫諾或遺期日而已如是日盱乃敢嘗食又經  
涂貫其闌中行李所取道半天下使客旁午一物不應  
呵罵立至其聲洶洶率常至乙夜迺定余亦為邑其勞  
大約類此而陽羨蔣侯之為是邑也頗立條目分別區  
處朞月之間以治辦稱于其暇時改築孔子廟學輸財

赴功不勞而集前日之庠陋頽靡今得爽塏之勝庭宇  
儀物一一告備始于仲春甲寅訖于季夏己丑是歲秋  
上丁躬率吏及諸生釋奠于廟絃歌讀誦以時肄習由  
是長老欣欣以學成為慶嗚呼人知樂成而不深惟其  
始之勤是猶為不知侯者邑人請余文為記故叙其本  
末繫之以詩詩曰猗嗟新學其舊維何中堂不薌麋鹿  
有家我營來斯匪筮匪卜雪然陽開人得耳目嗟爾邑  
子壤陋而污夫豈不學莫與為居小學大迷小慧大愚

云誰居之不在我侯嗟爾邑士侯則厚女弗撓弗遷迪  
以鄒魯非侯實能尚其自厚我歌此詩以告永久

歲寒堂記

東平李公自熙寧間歷藩服登從官言論風旨在人久  
矣中歲退休汶陽城東崇仁坊之里第地近而曠帶園  
為宅隱然靜深有山林丘壑之氣即其第中構為虛堂  
不侈不迫制度甚古其旁松竹蔽虧不受風日不改冬  
夏榜曰歲寒日與賓客遊適其上公歿鄉人敬公之居

歌詠不怠于是歲寒之名著聞于人公之子常武屬余文以為之記居亡何常武即世余亦南涉江淮踰嶺嶠更八九年乃得歸而常武之子復以為請嗚呼余自成童拜公退而與常武游忘懷莫逆至相樂也歲不我與死生契闊三十年間歛為陳迹而余又至堂上追惟曩時之人如對方策閱古人姓名邈乎不可見已顧視此身如憶往日之夢而忽復夢至其處恍然自喪悠然太息政復太上忘情之士不能不以之慨意而况余多難



易感從哀得白顧欲以蒲柳之質而誦後彫之語豈不  
謬哉雖然抑聞古之人始生三歲見恒河水念念不停  
已踰六十而覺者示以無童耄性旋嵐偃嶽野馬漂鼓  
而通人著論謂之不遷然則歲月貿易事物流變彼自  
爾爾吾何預焉公與常武雖身可使死而不可奪其所  
好風尚磊落如有生氣余雖早衰善忘而省念平昔如  
雞鳴後顧瞻東方終有精色此固常武所以見屬余亦  
自信而不疑尚何可以易此因叙而書之以遺其子使

歸刻石以識其先人之志而余亦私自警焉崇寧元年

三月十五日記

歲寒堂記

案前歲寒堂記為李常武作此篇為兄子偁作雖標目相同實係二記

人有是心不能無感感有邪正淺深之異而所以感之者固不一也觸于外而感于中者其感淺積諸中而感乎外者其感深凡一語一言之間一事一物之微卒然而遇介然而覺其機躍然動乎其前皆感也豈若涵泳德澤薰陶教化如南國之于甘棠而不忍翦伐晉人之

見峴山而泣然流涕蓋其流恩遺愛蘊積于中者既深則寓于物者宜其久而不替至如放逐不偶之臣羈窮無聊見屈潭賈井于邂逅之頃亦為慨傷而嘆息遁逸曠達之士過鹿門星瀨剡溪谷口未有不遐想其高風雅尚而欽羨之也此亦性情之所不能無者若槩之以尊德樂善景行好修之感則有間矣若夫前賢既遠不得握衣撰杖接其謦欬親其典型寤寐永歌瞻望不及或得其經行遊宦之鄉讀書講道之地封植疏剔創為

亭榭立為祠宇表揭褒崇以致其懷古仰高之思以行其流風餘韻之傳此固秉彛好德之良心非其感于中者有積累之素安得于歲月既荒之餘而能溯在昔之精英振既往之休烈若有所迫而不容自己者哉先大父煥章幼孤力學肄業于郊外精舍鄉先生默成潘公一見竒之指庵前竹命賦詩卒章有願堅松栢操同保歲寒心之句潘公大嗟賞刻其語竹上自是教均子孫厥後大父辱交當世名公刻苦磨礪奮身儒科由長沙

邑被召守嚴易信復歸郎省入侍經筵一說去國凜然  
風操著于麾節者三十年某在支孫中生之日最晚欲  
求昔讀書之地堙鬱不聞歲在癸巳嘗侍搗堂劉公見  
履齋先兄于伯父之塋舍教言甚款歷言其所以卜窆  
之由其地為真懿大師淨信庵即大父隱約修藏之所  
指其路旁之井曰此真懿所浚也緩步後岡披刪荆莽  
而指之曰此真懿之塔也真懿實為大父之母舅某既  
竦然展禮顧瞻徘徊不忍去明年履齋即世其子侃不

忘先兄之意榜此庵曰思泉矣歲在丙午始榜其堂曰  
歲寒取大父詩中之語也蓋其更練世故而得于涉履  
者漸熟探索義理而得于講明者漸精故尊德樂善景  
行好修之感歷三年而如新等百年而一日豈不以大  
父自立之卓然于是仰止其艱勤宣暢其幽眇欲以厲  
其勇往追念之志復以告詔其子孫乎倘非于父師之  
訓沈涵浸灌有日新之功何以越十有餘年而寄興于  
堂扁者鞭辟益親切而趣向益悠長哉于此可驗其學

矣今夫長松之下苔蘚露闌原泉淵水利澤沾漑酷旱  
不涸行道之人固已飽其甘冽清泚之味是亦足以慰  
子之思矣猶恨刻詩之竹蕪沒不存然今日之脩幹寒  
梢傲霜雪拂雲霄虛心勁節挺然而成林者非此君之  
本支餘裔歟某歲一登再登斯堂之上追念先世種德  
流慶之所基師友淵源之自始故迹隱然日邁月征風  
聲消寂惕焉大懼且有媿于琅玕翠色猶鬱乎其蒼蒼  
也間竊自念皇覽錫嘉適符章句尤汲汲焉惟恐學荒

行墮無以上緝乃猷凜乎一髮之引千鈞也風簷月牖  
與侶相期同保歲晚幽貞之操其志亦有年于茲矣暇  
日堅請書其顛末不敢固辭敬為之記重陽後五日宗  
叔某謹書

碑

慈應大師政公之碑

鄆須城大谷山昭善崇報禪院住持賜紫慈應大師文  
政姓令狐氏生須城令狐村其家相傳唐彭陽公楚是



其上世再從父頌天聖中為殿中丞族子相如今為朝  
奉大夫大師幼不戲弄踰冠度為僧護持戒律以謹密  
稱通大乘經論入諸講律老師宿學善其咨叩故丞相  
河間劉公葵三世大谷西山之陽以恩置寺賜額昭善  
崇報度靜人如令歷選于衆乃以大師住持為第一代  
披榛棘立基址種藝樵汲惟日不足已而緇素信服赴  
者接踵寺娓娓向有成今林樾蔽虧宇像輝煥薰修供  
養報國恩已亦報佛恩又受鄉人勸請造天寧大像建

開元三門賢皆千萬而施者樂輸爭付之權衡稱量洞  
入纖介既成咸懽然喜得未曾有性寬多恕雅不忍言  
人過失犯而不校未嘗以色加僮侍議者謂恢然長者  
衆中舉無與比鄉人士大夫下逮里巷老稚皆愛之重  
之一無間言凡住持二十七年政和三年五月辛卯示  
疾就滅春秋六十九僧臘四十五弟子崇能亦令狐氏  
兄子之子實嗣寺八年二月壬申與諸弟子新福等共  
二十八人歸全身建塔大谷東山下去寺四百弓占地

縱橫十有一肘乃勒銘石永伸哀慕其辭曰衆稽首慈  
應師歲三九獲衣止天華姿法泉洵孰求我覺導師爰  
結集建茲塔便時日赴山谷忽奮厲如復生又號慕如  
始亡藐我等懷謦欬守護此刹利羅維願力所加持續  
慧命永無盡大宋政和八年二月壬申立

贊

李氏繡佛贊

稽首慈悲父相好光明藏應現行願力針縷妙措成我

觀因緣空亦非自然性種種皆心造是心非造者佛子  
不思議熾然一念生諸聖所加持具足千百億我願如  
是故造作及見聞過見未來等同承佛記莖

又贊

巍巍堂堂妙莊嚴聚一念現前非針非縷文聞已彰何  
妨金露滿月當空誰知在處

古器圖贊

想古之人悠哉邈乎我獲其器賦象在圖有客見之笑

此展轉閱斯勤斯其人云遠我欲曉客眈不能言退觀  
古人恍獨如存千載寥寥不在圖外謂不信者取器以  
對

題跋

題醉道士圖

唐劉餗稱僧繇畫醉僧僧賂閭令加冠子為道士此說  
謬甚然好事者多信之二閭貴顯取賂僧徒已自難信  
又位置衣服悉異而云但加冠子尤非近理畫史稱范

長壽何長壽皆師僧繇各有醉道士圖行于世余見人  
家數本人物多少大小各不同安知非范何所為而必  
云閻所加張本其不然明矣韋誕懸籠書榜鬚髮盡白  
王子敬獨謂定無是事太宗傳呼畫師閻立本張彥遠  
深論其厚誣龍眠李侯猥亦信悠悠之談聞子敬彥遠  
之風其有媿夫

題醉吟先生傳

河間劉某往歲浮舟南邁與岳州太守許公實同塗相

約為江行棲宿守望之侶致相樂也居亡何公欲之官  
相別去今年到泗上聞醉吟先生聲稱籍籍一日見過  
愛其風尚蕭散問之家世則固許岳州之後又出諸公  
所為傳贊集叙酬贈書跋之語甚衆嗚呼岳州有賢子  
世之名士交口稱述之固宜而某也幸知其父子于先  
後二十餘年之間今先生所養超越不及汲于富貴此  
政朝廷所欲待以不次行矣強飯勉之遂將有立于世  
非但賦詩飲酒如是而止某雖衰晚多病尚庶幾及見

之惟日望之

闕題

古道釋二教源流至隋而止初班氏漢書立藝文志其  
後諸史皆闕至長孫氏隋書乃有經籍志并載二教所  
行書甚備其辭詳贍有叙暇目錄此以便觀閱自距國  
朝五百年間二教興廢多故皆可攷見欲為文續之病  
未能也

銘



來賢橋銘

筠于江西為支郡地左而勝號稱道院其邑故  
建城今為高安其水為蜀水亦曰錦水自西南  
來逕州治然後衡貫城中東入于贛並州諸山  
有大溪又從東北來注之所謂來賢橋者此溪  
也故時不梁居人為筏輿或略約交錯石上取  
過往來扶攜岌岌行者病焉邑子陳仲吉獨捐  
家資改創石杠縱五十有八尺廣十有八尺培

兩厓以為崇而其隩乃八九十尺始于紹聖二年九月成于明年三月陳氏有子為僧曰本明學于泐潭真淨文禪師余嘗識文于豫章又與明遇汶上他日明請余為銘因不得辭銘曰

亘亘法梁來賢之鄉注之錦水翁為貢章懸瀑十仞流沫瀾瀾莫敢以亂矧敢以厲爰斲其堅中廬之石是齒是翼是堞是辟跨其上征姦不見迹穹隆連卷隱虹雌霓康莊九衢閱此尋尺爾來衝衝過以枕席維水可渝

維石可泐我銘載之俾也無斁

董耘芝石銘

芝為名葆蓋亭亭三秀九莖衆所傾石為實巖萼屹屹  
風脊雨骨保而質

熊石銘

熊之祥石之壽祚子孫薦永久

蜀舍銘

某郡王萬寓鄭榜其居曰蜀舍持餘杭朱浚民

所為記過須城劉跂而請銘為之銘曰

噫嘻此舍是蜀非耶吞若兩川坤之維耶危乎高哉上  
青天耶赤甲白鹽崎嶇眉耶撐杖醬茹飯蹲鴟耶一物  
不有而不無耶噫嘻此舍是真蜀國身如壺公靡索不  
獲行以蜀馳卧以蜀息陰燕陽魏吳越璫錯徘徊周流  
誓不以易謂不信者有如此石

學易集卷六

欽定四庫全書

學易集卷七

宋 劉跂 撰

傳

錢乙傳

錢乙字仲陽上世錢塘人與吳越王有屬王俶納土曾  
祖賁隨以壯因家于鄆父顥善鍼醫然嗜酒喜游一旦  
匿姓名東游海上不復返乙時三歲母前亡父同產嫁

醫呂氏哀其孤收養為子稍長讀書從呂君問醫母將沒乃告以家世乙號泣請往迹父凡五六往乃得所在又積數歲乃迎以歸是時乙年三十餘鄉人感慨為泣下多賦詩詠其事後七年父以壽終喪葬如禮其事呂君如事其父呂君沒無嗣為之收葬行服嫁其孤女歲時祭享皆與親等乙始以顱頤方著名山東元豐中長公主女有疾召使視之有功奏授翰林醫學賜緋明年皇子儀國公病瘕癰國醫未能治長公主朝因言錢乙

起草野有異能立召入進黃土湯而愈神宗皇帝召見  
褻諭因問黃土所以愈病狀乙對曰以土勝水水得其  
平則風自止且諸醫所治垂愈小臣適逢之惟陛下加  
察天子悅其對擢太醫丞賜紫衣金魚自是戚里貴室  
逮士庶之家願致之無虛日其論醫諸老宿莫能持難  
俄以病免哲宗皇帝復召入宿直禁中久之復辭疾賜  
告遂不復起乙本有羸疾性簡易嗜酒疾屢發自以意  
治之輒愈最後得疾憊甚乃歎曰此所謂周痺也周痺

入臟者死吾其已夫已而曰吾能移之使病在未因自製藥日夜飲之人莫見其方居無何左手足攣不能用乃喜曰可矣又使所親登東山視菟絲所生篝火燭其下火滅處斃之果得茯苓其大踰斗因以法噉之閱月而盡由此雖偏廢而氣骨堅悍如無疾者退居里舍杜門不冠屨坐臥一榻上時間閱史書雜說客至酌酒劇談意欲有適則使二僕夫輿之出入閭巷人或邀致不肯往也病者日造門或扶攜襁負纍纍滿前近自鄰井



遠或百數十里皆授之藥致謝而去初長公主女病泄痢方始乙方醉曰當發疹而愈駙馬都尉以為不然怒責之不對而退明日疹果出都尉喜以詩謝之廣親宗子病診之曰此可無藥而愈顧其幼曰此且暴病驚人後三日過午無恙其家恚曰幼何疾醫貪利動人如此明果發癘甚急復召乙治之居三日愈問何以無疾而知曰火色宜視心與肝俱受邪過午者心與肝所用時當更也宗室王子病嘔泄醫以藥溫之加喘乙曰病本

中熱奈何以剛劑燥之將不得前後洩與石膏湯王與  
醫皆不信謝罷乙曰毋庸復召我後二日果來召適有  
故不時往王疑且怒使人十數輩趣之至曰固石膏湯  
症也竟如言而效有士人病欬面青而光其氣哽哽乙  
曰肝乘肺此逆候也若秋得之可治今春不可治其家  
祈哀強之予藥明日曰吾藥再瀉肝而不少卻三補肺  
而益虛又加唇白法當三日死然安穀者過期不安穀  
者不及期今尚能粥居五日而絕有娠婦得病醫言胎

且墮乙曰娘者五臟傳養率六旬乃更誠能候其月偏  
補之何必墮已而子母俱得全又乳婦因大恐而病病  
雖愈目張不得瞑人不能曉以問乙乙曰煮郁李酒飲  
之使醉則愈所以然者目係內連肝膽恐則氣結膽衡  
不下惟郁李去結隨酒入膽結去膽下目則能瞑矣如  
言而效一日過所善翁聞兒啼愕曰何等兒聲翁曰吾  
家孿生二男子乙曰謹視之過百日乃可保翁不憚居  
月餘皆斃乙為方博達不名一家所治種種皆通非但

小兒醫也于書無不窺他人靳靳守古獨度越縱舍卒與法合尤邃本草多識物理辨正闕誤人得異藥若持疑事問之必為言所生本末物色名號退攷之皆中末年攣痺浸劇其嗜酒喜寒食皆不自禁自診知不可為召親戚訣別易衣待盡享年八十二終于家所著書有傷寒論指微五卷嬰孺論百篇一子早逝二孫今見為醫河間劉跂曰乙非獨其醫可稱也其篤行似儒其奇節似俠術行而身隱約又類夫有道者數謂余言曩學

六氣五運夜宿東平王冢嶺觀氣象至月餘不寐今老  
且死事誠有不在書者肯以三十日暇從我當相授余  
笑謝弗能其後遂不復言嗚呼斯人也欲復得之何由  
哉沒後余聞其所治驗尤衆東州人人能言掇其章章  
者著之篇異時史家叙方術之士其將有攷焉

玉友傳

玉友其先出自后稷得姓九種別為禾氏居官長子孫  
又為庾氏有子粲從儀氏受道家術術成一息十日大

寒凝流而不冰世稱以為神其後子孫命氏不一惟甘氏最著傳數世有壺公既仙去歷千數百歲挹之輒出世謂玉友後或曰壺公者無冬夏隱壺中然時時猶復往來人間今玉友即壺公也為人精白不雜處少時帶經就畚方士中黃生白水真人一見定交杵臼之間相與差擇陶冶復修儀氏術烝烝柔和羣居化之雖蓬室甕牖投者如歸一巾一瓢意湛如也好事者或載與俱出所至爵者避席一坐盡傾既去人思慕若渴平陽侯

為相獨親厚之吏士人人爭欲進說皆不得間故人徐公為郎言于朝曰此臣家中聖人也去遊荆楚荆州牧虛齋中以館之使其子伯雅叔雅季雅受學焉嘗得董生春秋玉杯書閱而起喜曰知吾趣者不在玉杯中乎晚從王公子至山東山東聞聲爭交懼河間老人一見心醉歎曰吾屬徒知飲其德莫能名其器命史筮之遇需三之比三其占曰吉是謂三益味道之腴澤外粹中冰雪與居非金非石其臭如蘭有孚盈缶富以其鄰殆

將有不虞之好得于燕樂之間因賀曰斯人玉也諸君  
寧得而友之乎老人頓首幸甚字之曰玉友初甘氏宗  
族既衆仕宦高者入侍太官奉祠祭其在州郡為平原  
督郵為青州從事或封宜城侯劇陽子下至斗食丞甚  
衆其餘散居里邑田野往往銜鬻自售無老幼賢否皆  
得與之交倡優下吏狎溺尤甚號為懽伯愛之不容口  
由是交道遂漓縣官既覺之因著為令盡收其財佐公  
上母得藏器于家清廉之士至揭表自別獨玉友不然



瑰意琦行門無雜賓私淑諸人未嘗顯于時既性所守亦其勢然也與人接初若恬和而中甚烈天質醇白終始一致炎涼莫能移平居固罕見之人或望其顏色皆聘貽及深味其言無不心悅誠服識與未識以是沾丐所及人忘其少讒者或恨其不滿聞而笑曰君子多乎哉不多也他日老人坐草堂蒼官青士列侍堂下風月佳夕獨玉友與桐君在桐君方有高山流水之趣當是時玉友色愈粹風味愈勝相視莫逆歡然絕倒老人歎

曰平生聞高士稱義皇上人嘗謂虛語今乃信然恨不  
使陶靖節見之客有邂逅相遇者頽然內熱爽然自失  
人怪而問之曰見吾玉友耶客長歎曰閱人多矣疑其  
不從人間來其為人心服如此嘗自言吾師以寅生以  
酉終故酉日輒隱不見然出處亦無常度或對客未竟  
人又于他所見之或同時數家俱見雖人人自謂我良  
友然似是而非者十九得其緒餘者十五而得其真者  
百無一二至于官府及市肆若裨販之家雖願見之終

不往浮沈于世莫知其所終太史公曰甘氏得姓尚矣  
其後分封以邑為姓有中山氏青田氏桑落氏烏氏程  
氏邨氏此皆著姓日以滋盛而玉友名氏弗彰獨以德  
稱其亦有以也夫或隱或見莫攷其出處此與蒯子訓  
左元方何以異浮沈方外野人白士與之忘年而臣不  
得獻之于君故余為之攷論其行事未嘗不歎息于斯  
焉

誌銘

渤海西門參軍墓誌銘

君諱楫字道濟姓西門氏曾祖旦祖成允終南宮令贈左諫議大夫父介終尚書屯田郎中贈左朝議大夫其先出于魏鄴令唐季散遷再徙渤海家世儒學以長者稱至君尤好學立義重然諾名聞北州友人王大年母死貧甚君不待白大人哀婦裝賙之使葬與王朏俱客而朏病且死君躬訪醫挾持臥起至具棺斂表識告其家乃去是後賴君脫艱窘類如此者尚衆尚書郎當任

子君次最長辭曰楫累以進士薦久猶以恩釋褐而弟  
聿方壯可任及致仕官一子又推與季弟中中固辭乃  
受太廟齋郎親喪哀毀成禮族人敬重之無間言會郡  
有獄弟肅當逮其勢張甚君奮曰肅聿皆為吏中好學  
類不可使被污吾老無用其即罪因身會逮隨問而承  
弟與族人持不可君固不變繫之累月獄吏歎息不得  
已具牘竟坐免官吏守門奪取告身去聞者為恨而君  
恬自得久之更敕調象州司戶參軍不赴元祐元年五

月九日疾終享年五十五三娶王田高氏二男輅舉進士幼早世女皆嫁士人諸弟與輅以八年八月二十七日葬君渤海萬福里之原使鄉人王宜狀行事來請銘君少從家君游某得熟其為人大抵發憤悃幅節疏而氣閼專趨人之急終不以身困阨故悔止其人既去或自名遂閉弗道君亦不恨曰固何傷嗚呼君可謂無負于人矣銘曰嗟若人蹇不逢彌億年尚幽通

陳郡袁府君墓誌銘

元祐六年十月癸未陳郡袁府君諱百之病終於家八年十月庚午葬開封府雍丘故里之原政和元年秋君之子疇自杞如汶請銘于河間劉某曰先子之喪大父大夫公泣謂諸孤非深知吾子不以銘已葬而銘將納諸隧後歲餘大夫公亦捐館舍諸父并舉故縣之藏先子行事因弗果書訖十九年于茲昔者先丞相在位其取人也以無意先子之見知也以無求謂之深知其殆如此敢以銘累丞相之子其幸碑之死且不朽某固嘗

聞君之為人謹以君仲弟東之所狀事蹟叙次而為銘  
君字必強其先許人後徙雍丘曾祖楚材國子博士贈  
都官員外郎祖煥太常博士贈大中大夫父訖朝奉大  
夫母王氏德興縣君君少奇穎北海吳公奎趙郡李公  
師中一見異之登進士第調郡曹歷縣令遷幕府以選  
再為州教授積官至左奉議郎天性孝愛已壯猶嬉戲  
親側如兒時仕宦常擇比近率五日一通訊過期皇皇  
不能以日母喪哀毀勺飲不入口三日不得已于父彊



進粥因得羸疾中歲浸劇享壽纔四十有四為人美風  
致夷然蕭散善談笑博學軼于文辭嘗讀董生仕不遇  
賦歎曰命在天不遇其何憂道在我奚往而不可樂又  
方以天下為憂安知遇之非憂方自樂其樂安知不遇  
之非樂迺作樂不遇賦其辭類騷眉山蘇公見之笑曰  
不見此作久矣平居恂恂需緩至遇事侃然不為骫骳  
逢州遽卒盜貸所護錢當死君為掾讞之曰錢委窮卒  
實誨之盜乃與寇同抵罪死非法意州不聽固爭且曰

終不以一官易七人者命竟論減死其後君坐失出免官而囚已決不復改河東行和糴法遇舊歲蠲稅十八而糴如故計司仰給衆莫敢言君為從事被檄躬行田壟索室廬具以實告部使者又條利害大計言府府為言于朝某州水蓄官吏諱之督賦自若人情洶洶君為學官歎曰顧恐弗聽出位何傷則詒使者書累千言有同僚忌君悻悻一日當坐譴莫為謝君陰竄名分謗果以君故得釋又縣令以事忤守將怒甚削牘將傳重劾

人不敢諫君獨從容進說不聽不止後僚令知之皆來  
謝君曰亡是以告者過人更服其長者在官無幾時所  
立如此娶李氏朝散大夫綜之女子男璿鑄燾女嫁閭  
丘璪宋甫張無競銘曰惟袁氏與轅爰同出媯姓陳申  
公之後自固蓋延著名于漢其後轅爰寢微而袁獨顯  
春秋之際食邑陽夏其地後屬陳郡別于汝南暨樂陵  
故君上世稱陳郡以君之資稟學行而天年早終然班  
班見行事質之經義參之士君子之操幾可以無悔嗚

呼可哀也夫亦可以無憾也夫

崇儀使致仕趙公墓誌銘

元符三年春有詔故韓王普社稷殊勲後嗣未有顯者  
其推擇材行以名聞文思副使趙公思恭即日擢為西  
上閣門副使公惶恐上書稱臣駑下不如臣兄思復書  
報聞公不敢復辭迺拜受命是時今上踐阼纔再閱月  
公以宗臣後首見褒賞逡巡辭遜授受兩得于是中外  
悅服而公之賢益聞公字伯莊其先真定人曾祖韓王

居洛陽為洛陽人祖承贈太師中書令考從約贈建寧  
軍節度使妣祁氏永嘉縣太君公少以父任方冠而仕  
為廊延路管總司屬官監壽州稅杭州酒八作司監修  
官高陽關路總管司屬官太寧監及博州都監河北糴  
便司屬官勾當驂驥院提舉修河司屬官知威勝軍提  
舉右廂馬監知信安軍改寄嵐京西北路都監兼提舉  
馬監知乾寧軍改火山軍真定府路都監兼河北第十  
一將知永寧軍復改威勝揚州鈐轄召還管勾客省四

方館閣門公事請補外為京西南路鈐轄又請解閣門  
職自引進副使換崇儀使又請宮觀管勾西京嵩山崇  
福宮樞密院奏公才可任不當處以散地起為京東西  
路鈐轄再請宮觀復崇福宮蓋自三班奉職十五遷官  
而至崇儀使因止不復磨勘職事凡二十八任非朝廷  
選則官長辟除在官六十餘年未嘗見譴既再請閒遂  
以大觀二年正旦拜章乞致仕四日某甲子終于私第  
之正寢壽七十四後七日詔許致仕是歲三月某甲子

葵洛金谷鄉石樓里邛山之原先塋之側公剛毅多知  
遇事識大體自以勲臣之後義先國家在職蹇蹇未嘗  
顧望寓大名屬霖雨大河漲溢風濤下注城中憂在晷  
刻時故相居守以便宜檄公部禁兵從事郎吏惶惑而  
公指授神速人得赴功隄防獲完遂脫墊溺是日也檄  
公幾殆其處繁潰艱劇賴以濟務類如此御兵嚴而信  
不妄賞罰南陽大閱兵主帥聽其左右言將厚賞射者  
公請核實主將不聽欲必賞公亦必爭止弗賞凡事上

官未嘗少貶遇不可必達其意人服其直治郡奉法循  
理簡重不苛課最常視他人為優在朝廷習故事恭慎  
無與比嘗赴火山陞對奏事已而泣言曰先臣晉配享  
清廟顧真定故里未有廟食敢昧死以請哲宗聽許將  
詔立廟欲公親董役事故除真定府路都監居數月廟  
成故樞密使文簡馮公京公妻父也待公如賓友馮公  
薨朝廷欲公會葬故除京西北路都監公亦感慨為之  
盡力公輕財利重然諾有幕官卒貧甚公至鬻賣器皿



遣其喪歸族人貧者必歲時賙給之以為常善教子孫  
所居必延儒學尤喜賓客對之終日夕無倦色與人交  
初落落不合既厚善不復以事故移奪久而益親閒暇  
觀書史或勸公何不學佛書公曰忠于國孝于家不畏  
強禦不悔鰥寡吾以此生亦以此死又何必學佛書為  
勸者慙服娶張氏故侍中耆之孫某官某之女封安化  
縣君又娶馮氏封咸寧縣君子男四人希孟承議郎希  
旦右班殿直希尹希箴三班奉職其三子皆早世咸寧

君與希孟既舉公及前夫人之葬奉公遺範居喪如禮鄉人稱焉孫男十一人瑾理瓘璞琢琛璫環璫孫女二人嫁右班殿直郭才卿一尚幼公將老謂東平劉某曰我死子其為銘某曰知公與公所知豈少哉曰非有擇也顧心已屬子不可易自是亟以謂人曰銘我者劉君也公歿其孤遣人訃告且問銘既葬又使長子瑾自河南抵汶上持其鄉人劉平仲所狀事實以來曰得銘將納諸墓隧瑾致其父之意退就舍日造門泣以請

如始至某感服太息曰是公之子孫也已乃叙次而為  
之銘曰烈烈韓王翊國之興於昭顯融陪食廟烝纘惠  
我緒蔚其繩繩於王有光趙公維曾有偉趙公簡廉以  
質周旋踐更克戔小物乃勤民政亦總戎律不吳不敖  
又寧踐謚上聖臨御誕褒殊勲有來趙公陟陟于門擢  
首拜章義先臣昆盛德不忘風致斯存謂公百年尚膺  
多福翩其歸休

案永樂大典  
原闕二字

匪卜豈無他人墓文我屬

莫幽斯文惟信之告

朝奉大夫知淄州任公墓誌銘

公諱宗誼字仲宜姓任氏贈尚書司封員外郎諱肱之  
曾孫尚書工部郎中直史館贈吏部尚書諱子輿之孫  
太常少卿致仕贈正義大夫諱粹南陽郡太夫人尹氏  
之子上世故為博平人尚書公改葬于鄆因家焉公以  
父任為太廟齋郎調隴州隴安慶州合水二縣尉喪服  
除調濱州司戶參軍亳州鄆縣令用薦為宣德郎知曹  
州乘氏縣不赴簽書鎮海軍判官管勾京東轉運司文

字轉通直郎通判南平軍不赴監真州轉般倉轉奉議  
郎賜緋魚袋通判永寧軍不赴轉承議郎通判沂州今  
上即位恩轉朝奉郎朝散郎管勾宮觀以沂州督捕賊  
轉朝請郎轉朝奉大夫通判泰州不赴除知淄州借紫  
加勲騎都尉大觀元年七月二十四日寢疾終于家享  
年五十有九公闊達好義有氣略少時浮沈閭里泛愛  
下士人樂從之游既孤葵昏仰食貧甚至鬻其產贖用  
遂缺公曰差易耳勤力治生調度纖嗇居數年復其產

如初鄉人奇之宗族賴焉天性明吏事在官務核實不肯便文自營所臨可紀鄴有民椎埋剽攻敗則行錢詆譖數得脫前令不能制公因事殺之以徇有盜羣行入境微得其處會尉不在公部分方略以授主簿曰往取賊受賞以君有母故為君得主簿感激如公教盡獲之遂先公改京秩沂某氏子坐小法當受笞公審其可教爭于州將以贖論是歲遂預鄉舉真州倉室屋七百區費大莫敢任葺事歲霖雨壞米至萬計吏夜徙棄水中

以減跡公大撤而新之計司吝費公曰倉雖在真本漕  
六路聚米以供京師則費宜均賦之六路衆是公議上  
之朝遂著為令在濱攝滄之樂陵令在鄆攝須城令治  
行皆如在鄆凡民訴久不竟若冤不能自直者摘其要  
害躬為鐫諭無不厭服日所受書檄與凡小爭訟區處  
立決廷無留事獄戶可羅雀豪惡吏屏氣竟歲無敢犯  
或云為政必鋤猾吏奈何并容公笑曰懦令倚吏以辦  
又憚其縱則橫倚撫之是滋使藉以蠹民且去一猾吏

得一猾吏今予奪在我吏供筆札奉案牘而已何謂云  
云前後所辟薦公皆名士偉人其與人交傾蓋不疑不  
為回隱小不可輒以告然資樂易喜賓客酣飲笑噓恢  
然無忤人更服其長者晚尤好書閱古今評其人得失  
以自致其意領宮觀歸家趣供具召親屬故舊無虛日  
嘆曰老矣無所用如某人治某事我雖老尚能兼此人  
數輩雅知公者亦多以為信云方朝廷察公行能優除  
便郡未赴感疾不起壽不滿六十於戲惜哉娶尹氏南



陽夫人弟之子封壽安縣君子男四人羲之獻之允之  
延之皆舉進士羲之以公遺奏授假將仕郎女七人嫁  
王譽郭儔士廉張平張大辯謝敦頤儔右班殿真敦頤  
假承務郎餘皆舉進士一未嫁孫男七人以大觀二年  
九月二十六日薨須城縣黃陂鄉之劉村先塋之次某  
皇妣魯國太夫人正義公仲女也篤于同氣之愛憐公  
幼護視之尤厚南陽君子諸外孫愛某特異躬自鞠育  
某又少公四歲相與嬉戲俱從我先公授書學丁壯昏

宦出處相先後雖舅甥有兄弟之好焉諸孤謂知公無如某者請誌其墓謹論次如右為之銘曰服周于身棺周于服刻石表丈以為之擲度三之一得其函深如函之深為之蓋博其封可隱其坎可席從先大夫歸此真宅

承議郎東君墓誌銘

大觀三年九月庚戌承議郎東君端卿字表臣卒于京師十月戊寅返柩于中都粵十二月壬申葬東阿魚山

鄉挂劍里祖塋之左伯氏

案此下永樂大典有關文

直大夫正卿持

其季文林郎斌卿之子僧孺所狀公行實以來請銘為之銘曰維東有原漢傳之裔莽末散遷去足為氏在晉著作陽平是居唐季避亂占魯中都曾祖諱勅潛晦弗昭祖顯贈官貳卿兵曹考莊撫仕奮以儒服繇列大夫褒贈光祿母榮夫人追郡永嘉儷行相成實大厥家君由父任歷典二尉登封高邑輒著威惠主簿河沙錄事漸春交章尉薦去長斯民能令謂何馮翊白水滿歲為

郎階曰宣義惟大鎮聚齊有孫耿爰畀之監流亡綏定  
今上御極沛澤維均加命一等錫服朱銀信安入幕軍  
事用康通直于朝遂登議郎上膺大寶例進官序歸赴  
銓曹入趨班署云胡弗淑奄然徂遷七十有二亦克有  
年娶郭暨王張又繼室國恩褒寵咸有封秩七男二女  
儀然肖似稟植攸同多或蚤世直孺德孺二子服喪孫  
曰元矩亦頽而良女及女孫皆適士族宜于其家著稱  
雖睦吁嗟東君命實何尤出無利勢歸有先疇歲晚道

衍邇迴末路何以息我魚山之下刻詩幽石以慰其靈  
及後之人尚其永寧

國子博士趙公墓誌銘

天水趙達與其兄邁弟遠速遵以母夫人命卜政和元  
年十月己酉葬其祖考叔從叔弟暨伯祖妣叔祖妣考  
之所生母邁達之妻凡十一喪于鄆州翔鸞鄉石室村  
之原達以友人彭城顏岐為介紹請于河間劉某銘其  
祖博士府君之墓翼日持岐所狀行事來見而泣曰昔


我高祖父之考諱文興妣張氏在五代時潛晦弗耀自  
高祖父太子中舍知黃州贈給事中諱利妣南陽郡太  
君張氏而上皆葬齊之禹城為齊人曾祖尚書祠部郎  
中天章閣侍講贈右諫議大夫諱希言始愛東平樂其  
風土故我大父奉其喪與妣博陵郡太君崔氏暨伯季  
及三仙源君卜石室之原而藏焉無祿大父即世繫我  
先人亦早終以歲之不易諸孤藐焉契闊淹久蓋四十  
年于茲然後殯者獲從先侍講于此維趙氏遷徙之故

與大父之闕閼治行非銘曷以告後嗣謹按府君諱舜  
臣字和叔少舉進士不中父任太廟齋郎調澧州澧陽  
簿尉明州簿尉丁父憂服除調兗州司法親嫌移沂州  
遷兗州瑕丘令天平軍節度推官知興州順政縣擢大  
理寺丞知泗州招信縣未赴改濟州鉅野縣轉太子中  
舍賜緋轉殿中丞以薦監延豐倉遷博士熙寧八年八  
月二日以疾終享年五十六娶徐氏司農卿安期兄之  
女次黃氏內殿承制中立女次王氏天章閣侍講宗道

女皆封仙源縣君子男裔孫河中府司錄參軍以子贈  
通直郎次三人早卒次叔孫季孫女嫁承議郎楊慶基  
士人張子明張敷諸孫皆舉進士達登第為承議郎孫  
女嫁黃淵呂椿年曾孫男女十二人初侍講公與故賈  
公昌朝王公宗道並事仁宗皇帝說書崇政殿又並除  
侍講在經筵積歲以博厚著稱至府君世其家學尤長  
于歌詩善書得唐徐浩筆法居家孝友在官惠愛廉肅  
其交于上下誠而不阿位不售德識者歎憾二子病不



任事然孫曾衆多先志弗墜要諸始終顏氏之狀與其  
所言可攷不誣乃為之銘曰於維博士洵美且文惠其  
先人以暨有孫令得良吏州倚名曹政在二縣民廩存  
高我車既流我塗亦易云胡奪旃而不千里文山之兆  
是堅是塏勒銘幽宮庸告永載



學易集卷七

欽定四庫全書

集部  
學易集卷八

詳校官庶吉士臣吳烜

侍讀臣孫球覆勘

總校官進士臣朱鈐

校對官學正臣常循

謄錄監生臣薛翰

欽定四庫全書

學易集卷八

誌銘

朝請郎致仕蔡君墓誌銘

政和元年夏五月晦南陽蔡君晉如屬疾京師觀德坊  
寓舍高醫友人先後診視居十有六日粵六月丁未疾  
革屬殯以俟既絕升屋而復廢牀浴櫛遂小斂戊申大

宋 劉跂 撰

斂設奠于柩設明旌于庭母長安縣太君郭氏弟承議  
卽芝號哭受吊親黨內外悲哀感動嗣子向自鄆省疾  
庚戌及門徒跣哭踊以入妻同安縣君劉氏季子容聞  
訃繼以孥行七月辛巳至自鄆如向始至是月家如宋  
遂以柩歸八月丙申殯慶因資福院之東序設几筵于  
家設廬以殯三年六月庚申葬應天府宋城縣七里村  
之原先祖考墓之西北晉如諱蕃泗州推官贈太師諱  
希言之曾孫資政殿學士贈太師楚國敏肅公諱挺之

孫直龍圖閣知秦州贈朝散大夫諱某之子以伯祖樞  
密直學士諱抗遺奏授將作監主簿年十七補太學生  
治禮春秋有聲場屋屢以進士薦不中第調監潤州丹  
陽縣酒務不赴監京西作坊歲造軍器以萬計有勞遷  
秩監京南排岸司監楚州西河倉轉輸數滿百萬出納  
無害再遷秩今上踐位通籍于朝賜緋知鄆州陽穀縣  
遷通判潤州事州在東南為劇數行太守以治辦稱擢  
管勾南外宗室財用時拱州復建東輔又改通判事官

罷入朝朝廷深知其才屢攝以事欲顯用之會疾請致仕遂不起享壽四十八初官制行換承務郎凡十遷官至朝請郎二子學有家法同時被鄉薦女望嫁從事郎李襲譽珮嫁宣義郎劉長歷球塗尚幼晉如端厚有局量喜怒不形于色居家孝謹宗族無少長視為益友與人交悃悃無偽人愛重之無間言好學勤篤經史諸家下逮傳記稗官之言無不讀求訪異聞如弗及手自抄書數十百卷讎訂完密士大夫得其本多賴是正屬文

援據殫洽語不陳習多見倩託人人各如自其意出尤  
工于詩有文集十卷藏于家居官廉靜不煩苛遇事精  
察而喜寬不肯詭激取譽譽自歸之論者冀其施發振  
耀大見于時而壽不逾中人齋志以歿識不識咨嗟痛  
恨河間劉某曰我母燕國太夫人于晉如外王母寔同  
產姊先公視長安君為從母妹又嫁晉如長子而珮復  
歸我嗣子則壙中之文舍我其誰宜為然晉如少十餘  
歲素強無疾今反哭其死又銘之衰年感慨顧視惆恍



雖太上忘情亦何能已既叙次之系為辭章以伸悲哀  
之意告後之人銘曰顯允蔡宗世有承兮才諳詞詠志  
繩繩兮猗嗟若人幼修能兮詩書為車禮為御兮載籍  
繚邈精獨驚兮盎然行事彰慶譽兮王塗廓通來孔辰  
兮翱翔容與時且伸兮云誰杞之俾不振兮夢有二賢  
疾乃革兮腹無三壬壽何嗇兮慈老幼孤哀憂極兮佳  
城鬱鬱睢之陽兮我龜墨食隄吉良兮歸哉先塋永斯  
藏兮自古皆死惟德久兮咨爾後人嗣其有兮著諸石

章傳不朽兮

穆府君墓誌銘

政和二年六月庚寅宣德郎致仕河南穆翬字彥翔以疾終于齊州章丘縣里第九月庚申葬龍盤鄉女郎山之原其孤持奉議郎李致所狀行事詣河間劉某而請銘為之銘曰維穆其先宋公之裔支子分邑以謚為氏穆伯二子在魯有後穆生事楚申公為友元魏親賢奕葉通昏有唐女士醞酪稱珍著籍河南遠哉垂休逮君

上世徙居章丘曰倏曰賓維曾洎祖厥考諱端代襲令緒君有氣質力學勤劬流輩推先卜其脩塗既舉進士落落不偶通禮設科幡然以取起家掾曹司法衡州訊牘瀆繁吏不誅求淡如無營藏書是樂摹印鈔傳滿載歸橐計司辟請東平酒官剽蠹斂藏墜課以完餘暇構堂睇阮是名借留弗可以秩終更長山黎陽壯茲二邑察廉為丞流散安輯孝婦之河長豐之渠二邑大利君力以圖疇或寇旃垂就而懈人固蒙澤賞則弗逮君才

多有薦亦交章獨屹自守弗能頡頏判官懷州將赴復  
止曰予休哉遂致其事歷階幕府文儒二林陞對在前  
毅不少淹母霍繼劉養以孝著娶夏及趙侃侃攸助子  
男四人湊滋涖汭能讀君書世澤其延女嫁唐誦我姑  
之媳來齒諸婦世我藿食二幼未行君疾以侵壽四十  
九天固難諶收葬旁親嫁撫孤幼傾財赴急篤于故舊  
色厲言直悃悃無華孰不有美取數君多知君實詳莫  
如我信勒銘幽宮以告無盡

定陶任穎士墓誌銘

穎士諱之奇姓任氏贈吏部尚書諱曉隴西郡君李氏之曾孫贈司空諱頡榮國夫人王氏之孫殿中丞諱虞壽安縣君李氏之子其先曹州定陶人後徙鄆州家須城穎士以廕為太廟齋郎屢舉進士不中調滄州司戶未赴服考妣喪既除為定陶主簿邑故多宗族人以仕為難然初官侃然已有稱譽又為兗州仙源主簿用薦為通利軍黎陽令始至官與守將爭議蠲民租十八九

罷療以蘇朔部饑朝廷遣使賑拯條目纖悉他吏以違  
忤多得譴獨曉然見法意燭其曲折奉行以毋害獲偽  
為官文書印者寧不受賞寬其死罪頗采孝弟力田大  
指著為文數千言散揭田里訓諭邑人遠近感勸治聲  
流聞以通仕郎監南京勸院或發地得銅鐘六驗其款  
識曰宋公成之醴鐘人莫能攷穎士歎曰當始基之邦  
獲先世之器宜偶然哉著宋樂寶鐘文一篇上之朝學  
者服其精博又監鄆州酒務秩滿當赴召對未行屬疾

政和四年四月乙酉終于家年六十二初穎士既孤事  
所生張夫人如事嫡援崇寧赦今年九十封福昌縣太  
君與母弟之臨相愛篤密從姊壻及甥壻困窶皆以孥  
來寓為之絕甘分少至其病護視之且死辦後事常質  
衣周貧鄉評許其好施上官薦其才行者先後數十人  
娶席氏秘書監平之女孝睦循法度室家宜之姻黨稱  
焉先穎士二十四年年三十八卒繼室以其兄之女男  
女十有四人六年十一月壬寅葬須城盧泉鄉望山南

原先塋之次前夫人祔所著詩文二十卷藏于家鄉人  
董大夫正度所狀如此穎士與予同歲而少數月以兄  
事予晚又女我弟之子知其為人尤詳性靜不妄交杜  
門讀書寒暑不廢善論事不甚臧否人物尤好養生凡  
丹經氣訣方士之書類能涉其大略幼則得官而退居  
多于從事之日嘗從容言生年在巳得亥時為衝月建  
戌得辰日為衝術家謂之破又自察形色非宦達者相  
以是隨牒小官夷然自遂未嘗戚戚人知與不知不以



屑意澹無忤恨如是終身焉雅有士君子之度諸孤求  
為銘既敘次闕閱因備論之以遺其後人亦庶幾吾友  
之志云銘曰嘻嗟穎士孝友靖共學優政殊夫豈不逢  
命則仇之嗇其顯融齋志永歸維後之豐

堂邑縣丞李正雅墓誌銘

政和六年秋趙郡李正雅屬疾東平崇仁坊里第粵十  
月辛酉朔九日己巳卒于適寢享年五十二鄉人識與  
不識咨嗟相告語吾州名士當位于朝為顯人奈何止

于此其所善故人泣曰窮達之故死生之說吾友嘗從事于斯庸何恨惟其神情夷澹不可親疏今也未見其繼而仲公雅氏自其疾奔走謁醫入侍藥扶持卧起皇皇廢寢食既喪哀戚甚祭奠殯葬盡禮無違朝晡號泣聲不絕聞者為之流涕于是鄉人益復相告語非是兄安有是弟嗚呼正雅生世不售而名實在人迺如此是足以無憾歿後六十二日葬平陰縣翔鸞鄉天宮村之原正雅諱周南系出唐太尉弟德修之後曾祖緯贈戶

部尚書祖師中天章閣待制父伉承務郎母樂安孫氏  
生而資警異幼未知事已知孝視親顏色以為悅戚母  
夫人好施惠衆以為難獨委曲成就其意仲曰召南相  
愛篤密父同產嫁宋氏為將戰歿朝廷錄孤正雅方娶  
其女其家並壻列奏中命下矣辭不受白其父曰大人  
冒寒涉險遠護喪以其孥歸人將曰此特為周南計耳  
是時年甚少父奇之聽許宋氏移書趣十餘返竟不受  
已而舉進士中第為單州魚臺主簿令以罪聞州守疑

之檄主簿問狀正雅別白其誣令得以理去父喪除為  
濟州司戶參軍歲受民租每辦色入庾庭親閱視輸送  
如流吏莫能留難人無橫費往往持餘租歸家異時移  
疾他官攝事民衆詣州言不煩攝官寧宿邸以待疾愈  
後十餘年父老猶誦詠其事為陳州錄事參軍領市事  
賣價平允所治不譁而辦無抵罪者人德之會以親疾  
予告衆遮泣久乃得去換通仕郎便親監鄆州鹽場母  
喪服除調河南府軍巡判官不赴改堂邑丞攷滿歸遂

不復起所居在城東北地寬衍自天章公時藝松竹氣  
象靜深安居寡人事終歲不造官府其為詩清約有高  
致母亡布衣蔬食至終身四子碩頌賴頌銘曰巍巍李  
宗世穫其擾遺我堂邑蔚為良疇遭時盛隆士以志合  
襄其盈廷治聲奕奕去我堂邑行成于家退然譽處亦  
維國華天宮故原克有安宅亘百千祀式此封陌

士補之墓誌銘

東平士補之諱袞其先自周適晉有子為理官以士命

氏漢末變嘗為交趾太守隋末義總為侍郎家河內其  
後世遂家高密而補之四世祖如玉以天平軍判官卒  
貧不克歸因又家東平故今為東平須城人天聖慶歷  
間山東大儒以高行達學顯于時仕尚書兵部員外郎  
諱建中者于補之為祖妣韓氏考郊社齋郎諱安亨妣  
李氏補之年四歲失父知孝其母跬步不去側年十五  
未嘗出門巷既長以孝聞年三十五失母哀毀骨立杖  
乃能起兄才早世無嗣補之謹事寡嫂為之立後既壯

又授之室嫂亡乃分貲產贍之尤愛其弟永自以既孤  
惟一弟視之如傷寧身不擇利害惟弟之聽母有妹已  
嫁而卒貧無以葬補之力為營辦乃克葬崇寧初被鄉  
薦試禮部不中歸處庠序益自勵會詔舉八行鄉老故  
張公椿王公之明今東公正鄉王公撫與鄉人定計以  
補之孝友諸行皆應法當舉芳草具其事補之聞亟來  
見曰誰以此欺諸公事當核真偽況以詔誓不敢諸老  
度不可奪因姑止初母病寒厥醫不能識補之痛恨遂

學為方頃之稍以其術視人鄉閭賴焉數歲之後益明  
習近自里巷遠暨他邑來問者相踵大抵所治貴保養  
賤攻取善用剛劑充虛斷下內固根本使賊邪自消非  
甚不得已不為瞑眩或因憊危憫人莫能如何補之輒  
愈東平部使者所會又仕者尤衆凡疾不經補之不敢  
決以是延請無虛日而造門者黎明往伺見之已不逮  
則未昕而往猶屢返乃一遇或不得鹽齏出對客然來  
者蟬聯遂不得休率常過午乃始飲食窮日之力以應



接未嘗倦人多欲厚餽之辭不受或求藥草諸好用物以將意猶不肯盡取蓋橐中空虛妻子日闕乏未嘗卹也喜稱人善不言其短與在位者言未嘗及公事識者以此尤賢之政和八年三月疾病自診知不可為麾去藥艾將終神爽不亂居七日以四月二日終于寢年四十八鄉人驚怛出涕皇皇旬日娶李氏承議郎价女又娶李氏陳留丞侃女子男三人蘋蘩一幼未名女五人嫁吳大受李曇李璆二未行五月四日葬東阿崇山原

銘曰行修于家庭志行乎州里源遠其流長誰使涸也  
咫尺有樂者棘依止我悌弟盛德諸孫曾尚振于永世

夫人張氏墓誌銘

承事郎致仕北海王公景亮之夫人清河張氏世為濟  
州鉅野人曾祖澄祖永言尚書比部郎中父璧沂州臨  
沂縣尉母彭城劉氏夫人居家孝謹事舅姑盡禮膳服  
溫清先意承志夙夜不怠已而執喪奉几筵如事生少  
即失父既嫁失母有弟又不幸因泣曰吾親之後迺如

此何以生為景亮哀其意為偕往護其喪葬王氏墓之側歲時祭祀如禮景亮少以高材博達稱所與遊皆知名士雅喜賓客客至趣供具無虛日又好施予不計家有無王氏本贍財繇此滋屈夫人移用應辦至斥賣服珥未嘗使乏事景亮得官不樂出仕宦端居二十餘年泰然自遂夫人實相成之景亮讀書時時為夫人誦說聞竒節異行死生之致必嗟歎感慨泣數行下有疑似則曰某是歟某非歟所造與景亮多合善教諸子與宗

族怡怡如也晚得末疾元祐八年四月十五日終於淮陽軍其子官舍春秋六十有九後十六年景亮亦終於家以政和元年夏四月己酉合葬于鄆州須城縣北廬泉鄉先塋之原子男五人檻通直郎恕志撰掖志早卒餘舉進士女五人長適歙州婺源縣尉崔汝平次適進士吳勉餘未嫁孫男三人待行役孫女五人長嫁承務郎劉錫老餘尚幼銘曰汶山北原維洛之旁隱隱隆隆宅兆相望爰有大阡奠其中唐茂林邃深王氏之藏於

昭夫人德名既光夫以材稱子以孝彰歸哉此寔可謂  
不亡尚利嗣人俾熾而昌

夫人李氏墓誌銘

夫人李氏其先真定人後徙林

案此下永樂大典有闕文

父諱恩事

仁宗皇帝于藩邸擢知永寧軍陝西鈐轄母太原王氏  
夫人年十九嫁為居士慕容君諱宗古之妻居士曾祖  
福超以戰功顯于祖宗朝終成州團練使子孫多仕宦  
獨居士以奉親不為進取計買田汶上躬治產勤儉熾

晉親養以給夫人為內助實預有勞居士歿夫人持門  
戶簾組自力節逾厲不以貧故少貶使其子從事學問  
二子舉進士數不利禮部無以當夫人意愧戚不自安  
夫人曰得失命也吾固知之奚感為其子乃感服自安  
鄉人稱焉永寧之喪諸子不克葬至孫乃謀自汶上歸  
柩林

案此下永樂  
大典有關文

夫人欲與俱或曰年七十四方窮冬

豈遠行時耶夫人曰同氣獨吾一人在且先親客殯久  
今行不從吾死目不瞑竟往力任其事遂克葬遇事善

區處必中禮宗族內外事無劇易多諮稟而後決平居寡嗜好惟誦佛書積久數以萬計諸孫為錄其數而藏之晚歲更丁壯起居飲食如少者或問知其年高皆驚歲在單閼居士諱日具齋祭拜哭如儀已而退就次氣少劣家人進藥不受夜嚮晨趺坐而終實政和元年十二月二十七日享壽七十有七男弋次傳皆前卒次鍾美幼未名卒女嫁劉稟趙慶之劇秉李琳陳彥先孫男八人曾孫女一人明年三月十五日癸亥開封祥符西阮

村村居士墓鍾美以鄉人文林郎張補之所狀事實使  
中表兄張惲請予為銘余與居士族子朝奉郎將美游  
且久知夫人為詳為之銘曰桓桓永寧矯矯成州俱載  
顯勞遺澤以流有來夫人居士是同弗濟其腴在約而  
豐孰不壽考終也吉祥歸哉幽宮監此銘章

席府君夫人杜氏墓誌銘

通直郎席君諱延昌之夫人宋城杜氏慶歷宰相岐國  
正獻公之曾孫大理評事諱說之孫累贈朝議大夫諱



振之子母曰永嘉縣太君呂氏自唐杜封邑支分派別伯仕周卿赫食秦采建平以德器顯征南用籌略著代有台衮託我岐國夫人幼孤鞠于從祖直秘閣新逡巡擇對年十八歸席氏遂以令望宜于華族沃盥授巾饋食舉案肅雍之則中表效之從夫有秩例當享封邑不幸遘積憂之疾如未亡之痛家故為卿宗器莫備子獨能養衣帶不解金甌空遙稅衣遽復以政和二年二月二十七日終于寢壽五十有六男三人彥回彥軻彥雄

其季前卒女四人適太原府戶曹參軍杜績進士王效  
士衡其幼未嫁拱木已闕佳哉滕公之城筮宅靡移善  
乎魯人之祔是歲五月初四日合葬鄆州須城長山之  
陽孝嗣感橋梓之性懷屹屹之悲請以懿美傳之文翰  
定陶任之奇狀其行事請余為銘銘曰吁嗟夫人命矣  
何如府君是從安此幽居

朝散郎李公安人王氏墓誌銘

朝散郎贊皇李公公車之安人王氏京兆長安人曾祖

夷簡尚書工部郎中直秘閣祖希哲尚書駕部郎中父  
宗愿尚書虞部郎中母金華縣君水丘氏安人性端惠  
其親鍾愛之異他子然初無驕矜色母呼之必瞿然造  
前惟謹或問之對曰女當在母側未聞待屢呼而後至  
親族以其幼奇之及歸李氏會朝散公將之官成昏不  
踰浹月而行衆或憂其未能董家事已而隨事區處蔚  
有條理若素習然門內厭服終歲如一日親族聞之益  
以為奇自是朝散公歷官盡心公家不以家為慮實安

人有助云其事尊嫜尤謹飭烹飪縫紉非身為之不以  
進其待族屬雍睦有禮意僅御未嘗見其怨厲之色喜  
誦佛書持殺生戒甚嚴服飾有禽魚諸物象為其傷之  
皆弗以服蓋姻黨內外衆多咸視其舉錯為法以恩封  
崇德縣君崇寧三年十一月以疾終于襄陽縣官舍享  
年五十有六其後朝廷定命婦封邑視夫人之秩當為  
安人子男翱迪功郎襲慶府岷陽縣主簿女嫁從政郎  
成州司戶曹事王珏孫男仲襄習進士舉仲襄與一女

皆幼政和二年五月初三日葬東平府東阿縣魚山鄉  
崇梵原先塋之次前葬朝散公過同郡劉某而問銘其  
不敢以不能辭乃為之銘曰猗安人嬪茂家壽則晉維  
德遐有幽新宮在梵原誰哭其窆夫子時哉歸乎彌永

年

案時字上有闕  
文今無從校補

夫人龐氏墓誌銘

居士陳君諱孝常之夫人姓龐氏世為東平人祖諱高  
太子中舍父諱大同母韓氏夫人年三十歸陳氏為居

士繼室維居士世儒者家以信義著聞皇考贈秘書監  
諱希古仕顯于時治行尤篤厚天聖景祐間東平人論  
家法以陳氏為稱首其後居士不仕伯兄仕以病免家  
孔貧夫人持已清約奉養勤而孝謹如故不少衰居士  
歿夫人所生一男子洵尚幼三女子皆前卒夫人哀疚  
感厲益以節自持撫視諸子孫曲有恩意庶靖不喜游  
適屏居寡言笑雖近親希見其面誦佛書雖有故未嘗  
釋卷崇寧元年八月十二日以疾終享年七十七政和

二年五月四日葬鄆州須城盧泉縣之原合祔居士墓  
初秘書公長女適劉氏是為我皇祖妣實生先丞相先  
人早孤秘書公愛之齒于諸舅故凡陳氏之墓先人實  
銘之有若居士之潛晦弗曜得以振顯今夫人將葬見  
委論述某也曷云敢辭謹為之銘曰猗夫人嬪茂宗勵  
德操滋壽隆竅崇阜合幽宮彌億年尚永終

行狀

處士何君行狀

君諱君平字少嚴世家處州龍泉曾祖睿祖維父咸皆  
不仕母鮑氏君少舉進士不中然強學不勸自經史諸  
家皆手寫為編至老成誦不忘兼究大義學者重其勤  
年三十餘即罷不就舉郊居豫章里誦佛書作歌詩以  
經學授其子歎曰未彊仕之年甘心山林非吾孰為之  
者遂不復出治人事率五七年若十年以故不得已乃  
一至城邑人高其風士大夫往候之道相望君亦雅善  
賓客飲酒無虛日生事付妻子不問惟趣供具雖貧甚



意裕如也鄉里以是稱君長者君與人至歡而中泊然無係故久人尤親之事雖隱必語人曰不以藏吾心燕居寡言笑有威重雖妻子莫際其喜怒出則里中避道觀之所居室家人因舊將廣焉君曰乃以舊厭之乎不可由此終居不敢改葺或諷君殖生為異日計君曰我有子不為患何憂異日蓋君以是終身焉心無歉然者已而子登進士上第迎君之官鄉里無賢不肖來賀且祖君郭門外留連咨慕相與稱善人曰何君其效也君

以元豐五年五月某日得疾卒于家享年六十七娶李氏子男二人執中亳州判官次執德女一人嫁吳時中是年十月某日葬君某鄉某里某與君之子遊及識君鄉人多能道君行事大槩如此攷之不誣謹論次如右前亳州教授劉某狀

田明之行狀

曾祖永孚故不仕祖均故不仕考亮故贈左中散大夫母永嘉縣太君王氏本貫河南府姓田氏諱述古字明

之田氏本居密州安丘家世儒者明之早孤遊學京師  
甫冠補太學生事安定胡先生為弟子勤篤好問先生  
稱之娶尹師魯族家子河南縣主簿仲甫之女遂徙家  
河南凡四次以鄉薦不中第歎曰得失命也乃慨然發  
憤隱居講誦積二十餘年不復出哲宗嗣位搜訪遺逸  
故孫溫靖公居守西都以明之名聞詔除襄州司法參  
軍曰老矣不任為吏然君命不敢辭乃即其家廷拜受  
詔而不出仕孫公守鄭又奏以為州教授特詔從其請

居頃之河陽學官以嫌求對易命既下故王公巖叟時  
守鄭奏謂述古以處士起今新進後生援例徙非是且  
無以慰鄭學者詔又聽終任未幾除太學正改宣德郎  
充廣親北宅教授秩滿貧不能久留調簽書通判軍判  
官事轉通直郎今上登極轉奉議郎元符三年十二月  
六日以疾終享年七十夫人後五月亦卒子男處仁處  
訥處厚處恭處約女嫁進士張安石太廟齋郎溫萬石  
明之為人淳靜簡易不為表暴胸中坦無留閼與人交

傾盡不疑既久益親及其不合毅然去之莫能奪于書  
無不闕惟易中庸論語孟子老子乃其素所與申重復  
熟造其深旨餘不甚措意也邵先生二程先生皆居洛  
陽明之從之游司馬溫公居相鄰因徒步造門問經史  
大義語不及他事范翰林祖禹以編修資治通鑑日詣  
溫公溫公多召明之與之俱邵程司馬公皆重望來者  
率巨公顯人門無雜賓而明之獨以白士羈旅其間合  
堂同席相視莫逆語必殫竭未嘗少貶諸公以是敬愛

之晚歲獨好易古今諸儒訓詁得失歷歷別白常稱曰  
道言之必可行行之必可言今學者泥章句不知妙在  
日用因自為註祁寒盛暑造次顛沛未嘗廢卷與賓客  
言不事劇談惟論易則亹亹不倦日暮客欲去而明之  
談益勝意益精明之所著書未就客欲索其書上之朝  
明之遂不肯出友人張雲卿以累舉恩當釋褐貧欲母  
行明之出錢為助鄉人爭助之乃得去既去其妻與子俱  
病妻竟死家無一錢明之日往護視又辦喪事事竟然

後歸昌王薨假北宅教授官氏撰次行狀以故事遺白金百兩明之曰他人為文而我受其賜無是也使者屢反明之終不受通利並河一夕暴漲守將遽調急夫明之爭曰曷不視水勢今雖漲而平此將殺也吾民不可徒擾已而果無事當官不苟亦不為己甚居家廉儉衣不兼食不屬裕如也樂道自信以是終身焉嗚呼可謂吉德君子也夫將以建中靖國元年某月葬于其所之原晉陵鄒浩以明之語謂劉某曰我無稱于時然賢公

卿大夫多知我今皆亡晚乃得二人焉尚何恨獨謂吾  
子與浩耳今其葬也其能無言耶其許諾居無何其孤  
自洛抵汶上持治命來赴果以文為請其外祖尹夫人  
魯郡著姓與河南之尹宗族也故于明之有葭莩之好  
官于鄭又嘗同僚蓋知之詳熟于其來請謹叙次爵里  
閥閱及其學行大略以告鄒子為之銘庶幾乎明之之  
意而二人者亦以是自致焉

誄



王升之誄

維政和二年五月壬戌鉅野王君升之卒于京師七月  
丙辰返柩于鄆鄉人所厚善皆會哭其孤兒孟博出臨  
終書二紙遺余言嵎不幸病且死妻弱子幼恐此骨流  
落不得下從先人伏惟哀憐與諸賢經紀之書凡百餘  
字語無錯繆問其家言病甚棺斂皆能自營將絕付囑  
後事情不悲哽既授書其子教以而達余狀遂奄奄不  
能言余屬皆哭盡哀因相與定計告其家以八月乙酉

葬先墓之丙穴索橐中空無有賣屋未即售合凡賻贈  
得錢九萬五千乃使斲石治穿買椽席灰葦諸下里物  
事皆前為之期如期而寔君黃州翰林公之玄孫寶文  
公之子少不羈既長學問尤邃漢書效李長吉為詩有  
思致葬其親至破產雅不喜熾嗇又體羸多疾日事藥  
餌因積貧寔得官未及赴疾亟壽止四十有一惟前人  
悲哀稱述必著文字乃作誄以見意其詞曰大鈞無垠  
一播萬殊靡生不遂條達紛敷孰戕爾根隆夏隕枯哀

哀若人亦孔之辜偉君高門一世楷樞遺烈言言休聲  
吳吳爰及穆考養德豐腴維君妙齡孔鸞將雛踵武前  
修建旆禮輿逢辰清明駕言馳驅疇或柅旃罔所適徂  
機心日灰驕色自勑名列士版身佚里閭優游卒歲文  
史為娛毓草藝木畦苑躊躇良朋萃止肴設醴輟退察  
其私盜不宿儲寧獨貧攻亦復病拘蕭然壁立副是形  
癯休文革帶計月有餘幼安絮巾當暑不除乳石斷下  
糜粥充虛長為散人庶以全軀云胡遠行旅舍僮拘沈

病頓劇顛倒醫巫東野後事孝權遺書宜無他人顧以  
屬余嗚呼哀哉壯心兮摧頽白日兮須臾永違兮昭代  
下淪兮幽墟大暮兮何晨冥行兮空居嫠婦兮嗷嗷幼  
子兮呱呱誰與兮晤歌猶狂兮變魑謂君兮非存君墨  
兮猶濡謂君兮非亡君屋兮誰廬折芳馨兮素華湛玉  
瀝兮清醑況思君兮不見攬涕淚兮歔歔嗚呼哀哉塞  
物化之徂遷慨有生之迷途何神爽之泰定臨驚懼而  
弗逾遵寧宅于先丘寫幽憤于素旗庶無愆于遺託君

亦不昧夫所如

祭文

祭蔡致之文

嗚呼哀哉惟君行已蒞官蔚有模楷莊重安和備于衆  
事而敏焉若不足事機情刃紛其靡避分端殖義以自  
贍謂深固之未易搖兮少債而則折彼蒼之不靈兮將  
人事之憾也君之志已乎莫申詎常僚之能知文史足  
用而華采不售色養維謹宗族稱之而弱貧以遐遺恢

然無畔不忍與物忤而怨者或瞰其私繫君生之不逢  
兮又無以善其死毋安季子妻返外氏兮女病而無壯  
子惇然單軀魂惛惛而俱往兮卒無所止昔官守不祥  
遭故者實多羌改築以即利兮意且如善人何曾迪君  
以禍福兮謂善不善者非耶嗚呼哀哉君容恍如故兮  
音歎歎其未歇聯車騎銜杯酒之不可再兮獨安取彼  
異域肴寒酒薄君其勿吐而餐之兮遂于此乎永訣

祭韓擇之文

嗚呼士之逢時貴植本原稽其遇合繫命之存公抱利器舉無留難材譽籍甚師聽孔誼粵繇眷知茂對異恩褒語綢繆錫馬既蕃轍自西征來騁東軒攬轡駐車剖劇撥煩豪猾遠屏民力用寬我饁是豐我褐是完謂茲趣裝歸侍禁垣典領事樞逸駕騰騫誰使奄忽中晝徂犇維帝識公公實自論誓不徒報捐軀喪元遇事感激前靡險艱失寢棄食力竭氣殫盡瘁以歿此心如丹嗚呼哀哉惟我哀宗早接世昏占籍封圻熟公話言恭然

疾病枉駕在門視我砭艾情義益敦豈其翼朝竭為營  
魂容未就車食不終殮幼孺號呼泣血摧肝吏卒隕淚  
閭巷永歎百身可贖往叩天閭我獨疲卧莫撫公棺肴  
觴申奠瞻涕汎瀾嗚呼哀哉

祭王彥祖文

惟公德履沈茂踐揚高華服休五朝受社百歲名臣之  
後風流頓還矧公來歸永有瞻望數舍之隔倏然不留  
奄棄東維空號左轂嗚呼哀哉凡我里社蒙潤襲芳異



聲同悲寓此卮酒嗚呼哀哉

祭賈正之文

歲在敦牂識公于鄭澹其相求交情以定周旋契闊十有六年每見逾厚意加于前晚以季女歸我猶子載營菟裘共此州里公年長我雅多嘗更側聞道要又我所兄情均天倫義兼友益三日不談舌本荊棘間嘗謂言奈何捐書維揚老子同味其腴祁寒暑雨晤言不廢欣然忘懷歲月以逝公居有林尊俎累開我肴菲薄駕言

肯來闕然浹日往叩公戶胡恙之亟瞑卧不語嗚呼哀  
哉死生夜旦有來必還公歸不迷夫尚何言而獨固陋  
知我益寡流水高山誰當聞者遷骨于鄭公則不亡神  
其下來歆此一觴

代祭王左相文

穆穆王公盛德之興世有顯聞以遠厥聲曰嘉與商實  
相西京自導至儉江左底平惟皇有作克昌厥輔擢之  
不疑機柄以付訓齊臣工新美王度二紀艱哉始卒公

助據古殫洽傳誼雍容丙吉寬大胡廣中庸年高彌劬  
道大益沖古之惇史舉世是宗夫豈一名厥有大節繁  
潰危疑談笑以決淵渟無波山立不折皇哉得公千百  
而一惟皇厭世御氣上賓公亦不慙奄忽收神幽明異  
趣竟為君臣公乎知終實哀斯人斯人是哀亦私自唁  
公方通顯某則疎賤省戶選郎宰府除掾推轂提衡媒  
之上眷退而味公直道是依不以勢合亦不以離風雨  
如晦金石能移閱人孔多曾獨見知方以外使越在西


境薨問奄至哀惶悲哽蓄厚不貲覆以俄頃一訣終天  
無復音聲嗚呼哀哉三台夜坼一鑑朝亡宅更平仲祔  
歸柳莊殯帷沈寂銘旌飛揚城空鶴去劍沒龍藏嗚呼  
哀哉想公儀兮倏如故魂幻眇兮今焉處施則厚兮報  
無所臨文辭兮涕零雨嗚呼哀哉尚饗

祭弟法曹文

月日兄某與弟某以清酌庶羞之奠致祭于我亡弟法  
曹之靈我等流于荒裔繼罹酷罰零丁孤苦弟所委悉

六月晦前得疾雖病尚能言語囑累後事過朔以來昏  
閉三日以及大故舉家號呼殞絕相屬門戶一破萬事  
瓦解頭緒錯迕無所措手阿爹旅柩別寓新興阿姊堂  
殯未測所向汝之孀幼法堂歸鄆豈肯違汝易簀之言  
訊之有司謂當奏畫孀幼呱呱亦以事訴萬里跋涉是  
歸之死溫存煖熱要吾二人以此籌量遂卜近郊其地  
丁向西北鬱然構為新宮百步而遠又第三子長策崇  
寶後汝九日亦復夭化祔于室隅同就安厝嗚呼哀哉

蓋棺之後人理了足萬事體歇尚復何言汝兄與弟身  
任百責日重一日誰助我者此于吾弟能忘懷耶平時  
話言一本禮法稠沓鄭重雅所信可死亦不昧惟此一  
念恒毋淪溺世間諸緣自有次第以吾二人殷勤辯護  
似無足憂汝目不瞑豈有戀耶吐汝往哉捨此癡愛寧  
後三日肴酒安慰骨肉皆臨尚願歆茲



學易集卷八